

21776/18

BOSNA I HERCEGOVINA
FEDERACIJA BOSNE I HERCEGOVINE
KANTON SARAJEVO - OPĆINA ILIDŽA
OPĆINSKI NAČELNIK
SLUŽBA ZA OPĆU UPRAVU



BOSNIA AND HERZEGOVINA
FEDERATION OF BOSNIA AND HERZEGOVINA
SARAJEVO CANTON - MUNICIPALITY OF ILIDŽA
MUNICIPALITY MAYOR
GENERAL ADMINISTRATION DEPARTMENT

Broj: 10-sl/18
Ilidža, 15.11.2018. god.

15-11-2018
TAČKA DNEVNOG REDA
20. REDOVNA
SJEDNICA



OPĆINSKO VIJEĆE OPĆINE ILIDŽA

PREDMET: PRIJEDLOG ODLUKE O PRIZNANJIMA OPĆINE ILIDŽA

U prilogu vam dostavljamo Prijedlog odluke o priznanjima Općine Ilidža, u istom tekstu koji je bio dostavljen za 18. redovnu sjednicu Općinskog vijeća, a kako bi se ista uvrstila na dnevni red 20. redovne sjednice Općinskog vijeća.

S poštovanjem,

DOSTAVLJENO:

- 1. Naslovu
- 2. 2. a/a



Mirsada Hasečić
Pomoćnik općinskog načelnika
Mirsada Hasečić, dipl. Pravnik



PRIJEDLOG

Na osnovu člana 2. stava 3. Zakona o javnim priznanjima Kantona Sarajevo – novi prečišćeni tekst («Službene novine Kantona Sarajevo», broj 2/10) i člana 119. stav 1. Statuta Općine Ilidža-prečišćeni tekst (“Službene novine Kantona Sarajevo”, broj 33/10 i 18/16) Općinsko vijeće Ilidža na ____ . redovnoj sjednici održanoj dana _____ 2018.godine, *donijelo je*

O D L U K U

O PRIZNANJIMA OPĆINE ILIDŽA

Član 1. (Predmet odluke)

- (1) Ovom odlukom, utvrđuju se priznanja Općine Ilidža koje se dodjeljuju pojedincima i kolektivima sa područja općine Ilidža za izuzetne uspjehe u razvoju privrednih i društvenih djelatnosti, kao i značajan doprinos u odbrani općine.
- (2) Izuzetno, priznanja se mogu dodijeliti pojedincima i kolektivima koji nisu sa područja općine Ilidža, ako su njihovi rezultati primjereni ugledu općine.
- (3) Priznanja se mogu dodjeljivati i posthumno pojedincima, u skladu sa kriterijima iz člana 4. stav 1. tačka c. i d.

Član 2. (Vrste priznanja)

- (1) Priznanja u smislu ove odluke su:
 - a) Povelja počasni građanin/građanka općine Ilidža
 - b) Povelja za životno djelo
 - c) Zlatna plaketa
 - d) Srebrna plaketa
 - e) Zahvalnica
 - f) Plaketa odbrane
- (2) U jednoj kalendarskoj godini istoj fizičkoj ili pravnoj osobi može se dodijeliti samo jedno javno priznanje
- (3) O vrsti i dobitnicima priznanja odlučuje Općinsko vijeće Ilidža.

Član 3. (Oblik i izgled priznanja)

- (1) Priznanja, kao idejno, grafičko i izvedbeno rješenje sadrže prepoznatljive motive prirodnih ljepota općine Ilidža u okvirnom dijelu, sa tekstom: „Bosna i Hercegovina, Federacija Bosne i Hercegovine, Kanton Sarajevo, Općina Ilidža sa grbom općine centriranim na vrhu stranice.
- (2) Izbor idejnog rješenja priznanja vrši Općinski načelnik u saradnji sa Komisijom za saradnju sa drugim općinama, nagrade, priznanja, praznike i obilježavanje značajnih događaja i ličnosti.
- (3) Priznanja se štampaju na formatu A3 i dodjeljuju se u svečanom povezu.

Član 4.
(Kriteriji za dodjelu priznanja)

(1) Priznanja iz člana 2. ove odluke dodjeljuju se prema sljedećim kriterijima:

a) Povelja počasni građanin/građanka općine Ilidža

1) Počasnim građaninom/građankom općine Ilidža može biti proglašen državljanin BiH koji

nema prebivalište na području općine Ilidža koji je svojim naučnim, kulturnim, humanitarnim ili drugim radom, te naročitim zaslugama doprinio ugledu ili napretku općine Ilidža i njenom razvoju.

2) Počasnim građaninom/građankom općine Ilidža može biti proglašen i državnik ili funkcioner druge države, član međunarodne organizacije, odnosno organizacije druge države ili njihovih tijela koji je posebno zaslužan za općinu Ilidža i državu Bosnu i Hercegovinu u promicanju njenog suvereniteta, samostalnosti i identiteta na opšteprihvaćenim demokratskim načelima.

3) Imenovanje počasnim građaninom/građankom znak je počasti i ne daje nikakva posebna prava.

4) Počasnom građaninu/građanki ne dodjeljuju se druga javna priznanja općine Ilidža.

b) Povelja za životno djelo

1) Povelja za životno djelo dodjeljuje se za cjelovito djelo koje je pojedinac, državljanin Bosne i Hercegovine sa prebivalištem na području općine Ilidža ostvario u toku svog radnog i životnog vijeka, koje predstavlja izuzetan i vrijedan doprinos razvoju i ugledu općine Ilidža iz sljedećih oblasti: nauke, kulture, umjetnosti, vaspitanja i obrazovanja, zdravstva i socijalne zaštite, privrede, tehničke kulture, sporta, zaštite i unaprijeđenja životne sredine, poljoprivrede i drugih javnih djelatosti.

c) Zlatna plaketa, Srebrna plaketa i Zahvalnica

- *kolektivima koji su:*

1) ostvarili izuzetne rezultate u radu;

2) ulagali u proširenje proizvodnih kapaciteta;

3) postigli izuzetne rezultate u oblasti nauke, kulture, prosvjetne djelatnosti, vjerskog života, sporta, zdravstva, bezbjednosti, razvoju komunalne infrastrukture, zaštiti radne i prirodne sredine i razvoju dobrih međuljudskih odnosa;

4) dali izuzetan doprinos u ostvarivanju prava građana;

5) doprinijeli poboljšanju uslova rada i života u MZ na području općine Ilidža;

6) doprinijeli međunarodnoj promociji Općine Ilidža;

7) dali izuzetan doprinos u drugim područjima života i rada.

- *pojedincima koji su:*

1) inovatori na tehničkim i drugim unapređenjima;

2) doveli u opasnost svoj život spašavajući druge osobe i materijalna dobra;

3) kao donatori humano postupali prema pojedincima ili kolektivima;

4) posebno doprinijeli razvoju lokalne samouprave u MZ, općini i poboljšanju uslova života građana;

5) uspješno organizovali organe MZ i udruženja, te doprinijeli njihovom radu;

6) postigli izuzetne rezultate u oblasti poljoprivredne proizvodnje;

- 7) ostvarili posebne rezultate u sportu, vaspitno-obrazovnom radu, naučnom radu, umjetnosti i kulturi, na međunarodnom, državnom i federalnom nivou;
- 8) dali izuzetan doprinos u drugim područjima života i rada,

d) Plaketa odbrane

- 1) Plaketa odbrane dodjeljuje se kao posebno priznanje općine Ilidža za doprinos u Odbrani općine Ilidža, kao i organizaciji života i rada građana u ratnim uslovima, kao i ratnim jedinicama i štabovima koji su se istakli u odbrani, pod uslovom:
 - 2) da je pripadnik oružanih snaga imao prebivalište ili boravište na području Ilidže u periodu 06.04.1992.-23.12.1996. godine, a koji je stupio u pripremu i odbranu države od 18.09.1991.-31.12.1991. godine i ostao neprekidno do 23.12.1995. godine, ili je ranije demobilisan od nadležnih vojnih organa;
 - 3) da je kandidat postigao izuzetne rezultate u odbrani Ilidže;
 - 4) Plaketa se može dodijeliti pripadniku oružanih snaga koji u toku rata nije imao prebivalište na području Ilidže, ali je dao izuzetan doprinos u organizovanju oružanih snaga u odbrani teritorije Ilidže;
 - 5) za svakog kandidata koji se predlaže, potrebno je dostaviti dokaz o posjedovanju ratnog priznanja, odlikovanja i dr.;
- (2) Godišnje se može dodijeliti jedna Povelja počasni građanin/građanka općine Ilidža, jedna Povelja za životno djelo, jedna Zlatna plaketa pojedincima i jedna Zlatna plaketa kolektivima, dvije Srebrene plakete pojedincima i dvije Srebrene plakete kolektivima, pet Zahvalnica, kao i jedna Plaketa odbrane.

Član 5.

(Ograničenja za dodjelu priznanja)

- (1) Priznanja se ne mogu dodijeliti kolektivima ili pojedincima kojim su ista dodijeljena u posljednjih pet godina.
- (2) Priznanja se ne mogu dodijeliti uposlenicima Općine Ilidža za rezultate ostvarene u obavljanju poslova predviđenih opisom radnog mjesta.
- (3) Izabranim zvaničnicima svih nivoa vlasti u Bosni i Hercegovini.
- (4) Licima koji su pravosnažnom presudom domaćeg ili stranog suda osuđena na zatvorsku kaznu za krivična djela.
- (5) Licima koji svojim djelovanjem narušavaju ugled općine.
- (6) Priznanja se ne mogu dodijeliti kolektivima:
 - a) prema kojima se vodi stečajni i likvidacijski postupak;
 - b) koji imaju neizmirene obaveze po osnovu direktnih poreza prema nadležnoj poreznoj upravi FBiH osim ako dostave validan dokaz o reprogramu duga;
 - c) koji imaju neizmirene obaveze po osnovu indirektnih poreza prema nadležnoj upravi za indirektno oporezivanje BiH, osim ako dostave validan dokaz o reprogramu duga, odnosno dokaz da nisu u sistemu PDV-a.
 - d) koji su propustili ispuniti finansijske obaveze prema općini Ilidža.

Član 6.

(Javni poziv za dodjelu priznanja)

- (1) Općinsko vijeće odlukom raspisuje Javni poziv za predlaganje kandidata za dodjelu priznanja Općine Ilidža.
- (2) Odluka o raspisivanju Javnog poziva sadrži vrstu priznanja, mjesto oglašavanja, kriterije za dodjelu priznanja, kolektivi i pojedinci koji mogu podnijeti prijedloge za dodjelu priznanja i rok za podnošenje prijedloga za dodjelu priznanja.
- (3) Javni poziv se objavljuje najkasnije 90 dana prije održavanja svečane sjednice Općinskog vijeća povodom Dana Općine.
- (4) Prijedlozi za dodjelu priznanja dostavljaju se Komisiji Općinskog vijeća za saradnju sa drugim općinama, nagrade, priznanja, praznike i obilježavanje značajnih događaja i ličnosti (u daljem tekstu: Komisija).

Član 7.
(Ovlašteni predlagači)

- (1) Prijedloge za dodjelu priznanja mogu podnositi građani pojedinci, udruženja građana, savjeti mjesnih zajednica, boračke organizacije i udruženja, političke partije, vijećnici Općinskog vijeća Ilidža, Općinski načelnik, ustanove i drugi organi i organizacije sa područja općine Ilidža.
- (2) prijedlog za dodjelu priznanja mora biti pismeno obrazložen i sadržavati sljedeće:

a) za pojedince

- 1) biografiju kandidata
- 2) tok njegovog rada i ostvarenih rezultata
- 3) temeljito obrazloženje i razlog predlaganja
- 4) naziv javnog priznanja i područje za koje se podnosi prijedlog.

b) za pravne osobe

- 1) osnovne podatke o organizaciji djelatnosti
 - 2) ostvarene rezultate rada
 - 3) temeljito obrazloženje razloga predlaganja
 - 4) naziv javnog priznanja i područje za koje se podnosi prijedlog
- (3) Uz prijedlog se prilaže potrebna dokumentacija (objavljeni rad, kopije diploma, priznanja, zahvalnica, uvjerenja i drugih dokaza).
 - (4) Prijedlog za dodjelu priznanja može se dati u skladu sa kriterijima iz ove odluke za ostvarene rezultate u petogodišnjem razdoblju.

Član 8.
(Odluka o dodjeli priznanja)

- (1) Komisija je dužna da razmotri sve dostavljene prijedloge za dodjelu priznanja i Općinskom vijeću dostavi izvještaj o pristiglim prijavama sa prijedlozima dobitnika priznanja.
- (2) Općinsko vijeće na osnovu izvještaja Komisije iz stava (1) ovog člana donosi odluku o dodjeli priznanja Općine Ilidža.

Član 9.
(Opoziv priznanja)

- (1) Priznanja dodijeljena u skladu sa ovom odlukom mogu se opozvati ako se dobitnik priznanja pokaže nedostojnim priznanja.
- (2) Opoziv priznanja vrši se na način i po postupku za dodjelu priznanja. Priznanje će biti opozvano ako se naknadno utvrde ograničenja utvrđena u čl. 5. ove odluke.
- (3) U postupku opoziva priznanja, Stručna služba Općinskog vijeća može pribaviti dokaze u skladu sa čl. 5. ove odluke.

Član 10.
(Stupanje na snagu)

Ova odluka stupa na snagu osmog dana od dana objavljivanja u "Službenim novinama Kantona Sarajevo".

Donošenjem ove odluke prestaje da važi Odluka o priznanjima općine Ilidža (Službene novine Kantona Sarajevo" broj: 36/10 i 1/14).

PREDSJEDAVAJUĆI

Muhamed Omerović

Broj:
Ilidža,

2018. godine

Obrazloženje

I PRAVNI OSNOV

Pravni osnov za donošenje ove odluke sadržan je u članu 2. stav 3. Zakona o javnim priznanjima Kantona Sarajevo - novi prečišćeni tekst, („Službene novine Kantona Sarajevo broj: 2/10), u kojem je definisano da jedinice lokalne samouprave mogu svojom odlukom utvrditi javna priznanja i članu 28. Statuta Općine Ilidža - prečišćeni tekst („Službene novine Kantona Sarajevo broj: 33/10 i 18/16) u kojem je, pored ostalog utvrđeno da Općinsko vijeće donosi odluke, druge propise i opće akte i daje njihovo tumačenje.

II RAZLOZI DONOŠENJA

Općinsko vijeće je Zaključkom broj: 01-02-232/17 od 18.01.2018.godine, pokrenulo inicijativu za izmjene i dopune Odluke o priznanjima Općine Ilidža („Službene novine Kantona Sarajevo broj: 36/10 i 1/14) uz sugestiju da Služba za opću upravu, kao nosilac izrade ove odluke pribavi inicijative i prijedloge za izradu izmjena navedene Odluke, od općinskih vijećnika, političkih partija i svih službi Jedininstvenog općinskog organa uprave.

Shodno navedenom Zaključku ova služba je pribavila prijedloge i sugestije od navedenih subjekata, te na osnovu analize istih pripremila Prijedlog odluke o izmjenama i dopunama Odluke o priznanjima Općine Ilidža koji je dostavila Općinskom vijeću na razmatranje.

Općinsko vijeće Ilidža, na 16. redovnoj sjednici, održanoj 21.06.2018. godine donijelo je Zaključak:

1. U skladu sa članom 77. stav (2) Poslovnika o radu Općinskog vijeća, Općinsko vijeće je o Prijedlogu Odluke o izmjenama i dopunama Odluke o priznanjima Općine Ilidža raspravljalo kao o Nacrtu Odluke o izmjenama i dopunama Odluke o priznanjima Općine Ilidža.
2. Utvrđuje se Nacrt Odluke o izmjenama i dopunama Odluke o priznanjima općine Ilidža (sa primjedbama vijećnika iznesenim na sjednici Vijeća a koje su sastavni dio javne rasprave) i ista se upućuje u javnu raspravu u trajanju od 30 dana.
3. Zadužuje se Služba za opću upravu da organizuje i provede javnu raspravu o Nacrtu Odluke o izmjenama i dopunama Odluke o priznanjima Općine Ilidža (u daljem tekstu: Nacrt Odluke) te da istu radi davanja primjedbi, mišljenja i sugestija dostavi službama za upravu, stručnim i posebnim službama Općine, Pravobranilaštvu Općine Ilidža, savjetima mjesnih zajednica – putem Stručne službe za koordinaciju rada mjesnih zajednica, boračkim udruženjima sa područja općine Ilidža putem Službe za boračka pitanja i udruženjima na području općine Ilidža-putem Službe za obrazovanje, kulturu, sport i informisanje.
4. Zadužuje se Služba za opću upravu da Općinskom vijeću podnese Izvještaj o provedenoj javnoj raspravi o Nacrtu Odluke i da Vijeću dostavi na usvajanje Prijedlog Odluke o izmjenama i dopunama Odluke o priznanjima Općine Ilidža.

Na osnovu navedenog zaključka ova Služba je dostavila Nacrt Odluke o izmjenama i dopunama Odluke o priznanjima Općine Ilidža: službama za upravu, stručnim i posebnim službama Općine, Pravobranilaštvu općine Ilidža, savjetima mjesnih zajednica-putem Stručne službe za koordinaciju rada mjesnih zajednica, boračkim udruženjima putem Službe za boračka pitanja i udruženjima sa područja općine Ilidža-putem Službe za obrazovanje, kulturu, sport i informisanje.

III REZULTATI JAVNE RASPRAVE

Do isteka roka za obavljanje javne rasprave odgovore su dostavili Savjeti mjesnih zajednica i Stručna služba općinskog vijeća, dok boračka udruženja i udruženja sa područja Općine Ilidža nisu dostavili primjedbe, prijedloge i sugestije.

Što se tiče Savjeta mjesnih zajednica, svi Savjeti, osim Savjeta mjesne zajednice Sokolović Kolonija, dostavili su odgovore da nemaju primjedbi, prijedloga i sugestija na Nacrt odluke o izmjenama i dopunama Odluke o priznanjima. Većina prijedloga Savjeta mjesne zajednice Sokolović Kolonija su prihvaćeni i sastavni su dio ove odluke.

Takođe, sastavni dio ove odluke su i prijedlozi Komisije za statut i propise i Komisije za saradnju sa drugim općinama, nagrade i priznanja i obilježavanje značajnih događaja i ličnosti i vijećnika Općinskog vijeća.

Polazeći od člana 47. stav 3. Pravila i postupka za izradu zakona i propisa F BiH („Službene novine F BiH“ broj: 71/14) kojim je regulisano da ako se mijenja ili dopunjuje 50% ili više članova osnovnog propisa, potrebno je pristupiti donošenju novog propisa, pristupilo se donošenju nove Odluke.

Stručna Služba općinskog vijeća je predložila donošenje nove Odluke o priznanjima Općine Ilidža, što je i uvaženo. Stručna služba Općinskog vijeća je ostala kod već ranije dostavljenih prijedloga i sugestija za Prijedlog odluke o izmjenama i dopunama Odluke o priznanjima općine Ilidža, koje sada smatra primjedbama i prijedlozima na Nacrt odluke o izmjenama i dopunama Odluke o priznanjima Općine Ilidža, te je uvažen prijedlog da se uvede novo priznanje i to Plaketa odbrane.

IV POJEDINA RJEŠENJA

U odnosu na dosadašnju Odluku o priznanjima Općine Ilidža, u članu 2. uvedena su nova priznanja i to: Povelja počasni građanin/građanka Ilidže, Povelja za životno djelo i Plaketa odbrane te su zadržana dosadašnja priznanja Zlatna plaketa, Srebrna plaketa i Zahvalnica.

U članu 3. ove odluke preciziran je oblik i izgled priznanja, te je definisano da izbor idejnog rješenja vrši Općinski načelnik u saradnji sa Komisijom za saradnju sa drugim općinama, nagrade, priznanja, praznike i obilježavanje značajnih događaja i ličnosti.

Savjet mjesne zajednice Sokolović Kolonija predložio je nove kriterije za dodjelu priznanja, koji na opći način regulišu dodjelu priznanja, pa se predlagač opredjelio za zadržavanje postojećih kriterija koji su mnogo konkretniji i predlagaču dodjele priznanja daju određena usmjerenja, stim da je dodat kriterij doprinosa međunarodnoj promociji Općine Ilidža, što je regulisano članom 4. ove odluke.

Predlažemo da se za navedena priznanja ne dodjeljuju novčane nagrade, kako to ne bi bio prevashodni motiv za predlaganje kandidata, što je i sugestija Stručne službe Općinskog vijeća.

Nije prihvaćen prijedlog Stručne službe Općinskog vijeća da se Povelja za životno djelo dodjeljuje svakih pet godina obzirom da je članom 7. definisano da se prijedlog za dodjelu priznanja može dati za rezultate ostvarene u petogodišnjem periodu.

Takođe je ograničen broj priznanja koji se mogu dodijeliti u toku jedne godine.

U članu 5. ove odluke ograničenja za dodjelu priznanja regulisana su na prijedlog vijećnika Tinjak Nedžada i Komisije za statut i propise.

U članu 6. stav 3. regulisano je da se javni poziv za dodjelu priznanja objavljuje najkasnije 90 dana prije održavanja svečane sjednice Općinskog vijeća povodom Dana Općine i to na prijedlog Savjeta mjesne zajednice Sokolović Kolonija.

U članu 7. prihvaćen je prijedlog navedenog Savjeta mjesne zajednice da se reguliše sadržaj prijedloga za dodjelu priznanja, te da se prijedlog podnosi za rezultate ostvarene u petogodišnjem periodu.

U članu 8. regulisan je način dodjele priznanja odnosno Odluke o dodjeli priznanja.

Članom 9. stav 2. regulisano je da će priznanje biti opozvano ako se naknadno utvrde ograničenja utvrđena u članu 5. ove odluke, a stavom 3. ovog člana regulisano je da u postupku opoziva priznanja Stručna služba Općinskog vijeća može pribaviti dokaze u skladu sa članom 5. ove odluke, što je bio prijedlog Komisije za statut i propise.

Članom 10. regulisano je stupanje na snagu ove odluke i prestanak važenja Odluke o priznanjima općine Ilidža („Službene novine Kantona Sarajevo“ broj: 36/10 i 1/14).

Služba za opću upravu

BOSNA I HERCEGOVINA
FEDERACIJA BOSNE I HERCEGOVINE
KANTON SARAJEVO - OPĆINA ILIDŽA
OPĆINSKI NAČELNIK

SLUŽBA ZA OPĆU UPRAVU



BOSNIA AND HERZEGOVINA
FEDERATION OF BOSNIA AND HERZEGOVINA
SARAJEVO CANTON - MUNICIPALITY OF ILIDŽA
MUNICIPALITY MAYOR

GENERAL ADMINISTRATION DEPARTMENT

PRIJEDLOG

ODLUKA

o priznanjima Općine ilidža

Ilidža, August 2018.godine

Nosilac izrade:

Služba za opću upravu

